

雪

翁

詩

集

雪翁詩集卷十一

五言排律

明慈谿魏 畊白衣撰

送蔣平階游山陰

觀濤浙江去采藥剡溪行射的連滄海雲門接赤城池
邊知洗屐酒後曾書經揮麈沙門聽籠鵝羽士迎竹林
標勝槩蘭渚謝塵纓五月楊梅熟三秋荷芰生留連增
逸興歌笑蕩餘情蘿月遙相憶龍脣琴自鳴

送人阿育王禮塔

阿育靈標迴玉毫照萬方自來青峴上空憶白雲鄉送

子攀河柳銜杯度晚陽月華流雪樹帆影下錢塘海島
蓬萊出仙居絳闕長登臨三佛地瞻禮水清傍嵐起鰲
波映風鳴鳳鐸翔毘盧如可踏試爲問空王

昭慶寺

宣律唐年寺紅樓照玉清湖臨明聖水煙遶鳳凰城
鐸穿雲響金銀耀日明廊迴羣岫轉巷曲雜花迎越嶺
霞紋散吳宮嵐彩晴鳴鐘邀上客候犬識簪纓瓜果雁
王獻芙蕖鹿女擎伽藍齊洛下香積勝東京秋日黃花
節征人萬里情看山眠戶牖俯澗愛澄泓願借曇摩地

栖遲得此生

爲葉菴老人住靈岩作

先生有道者何日罷官來諫草前朝重牛車此地迴白
雞鳴響屨香象度琴臺木食窮青歲袈裟染碧苔禪深
飛鶴遶檐動妙言開幕雨然春萼朝霞弄早梅西施洞
自好鄧尉嶺須回高嘯空山裏傳經曲澗隈紺蓮倘許
種盧橘也容栽摩詰籃輿至相將著屐陪

出破楚門遙望支硎諸峰晚抵鄧尉山訪俞南史
不值歸舟作

白馬支公舊升天說此方秋山無遠近秀色與湖長彩
翠參羣木寒嵐繞夕芳鳴鐘飯僧去抱瑟送雲翔衣上
泉飛雨橋邊草拂霜王官原有谷鄭氏已名鄉櫟葉千
溪碧柑園一樹香尙玄傳丈室看竹到迴廊苔壁留銘
字磁甌映日光躊躇還北郭回首但蒼蒼

送姚宗典王廷璧俞南史歸莊葛雲芝費誓嚴祇
敬葉世全方將文果十子遊越州

三江天子地十哲竟同遊欲取蓬萊石還觀蜃氣樓伐
山攀謝駕泛雪值王舟秦嶺碑應識梅梁殿可求增城

遙靄積仙洞紫霞流范蠡曾餘劍計然有逸籌壯懷知
耿耿清興故悠悠跡寄尋廬趣風迴摘葉愁總希飛翰
彩灑落寄瀛洲

東宣城沈壽民徵君

夙聞黃憲美其訝郭林優十載遙相望春風憶滿樓直
聲雙闕震諫草五雲留拂袖還山宅揮絃枕碧流紅顏
軒冕薄丹竈羽人幽庭養銜芝鶴花眠露地牛風流傳
禹甸江水隔南州才愧宣城好詩添沈約愁梅花羌笛
引何日敬亭秋

越中送朱大用礪謁華亭令

華亭傳鶴苑申浦屬蛟津
游子聲須遠憐才氣故親三
杯江上別二月柳條新人遠
雲門宅車停吳下塵鱸魚
稱美味蓴菜定霑脣去矣逢
仙吏桃花方及春

杭州尋三宜大士

沙門精八解給苑鳳城隅
解脫曾攀駿風流絕愛儒
隔江常騁望招手故相趨
講法寒潭皎能言妙理殊
雨花霑北雁春色滿西吳
興致因君起方將汎鏡湖

和李明府令哲蒼山生壙紀事蓋宅故有葛仙公

井而爲壙又得丹竈也

見說營仙蛻增城繞郭來逶迤蒼弁勢演漾洞湖迴夙
昔稱佳吏今茲應上台玉棺紫府賜丹竈地靈開已驗
真人井更聞桐柏臺白雲乘可必化鶴想悠哉花木都
緣澗春秋合屬杯親朋多暇日臨眺定徘徊

仲春山陰逢金四世泰有贈時與尋山水迴舟

我久聞翁叔相逢在越城無媒人自合有志水同清偶
鍛師中散灌園揖呂卿且須對茅宇還欲醉花亭吟臥
秦山柳徘徊鑑渚鶯鬪雞將走馬上已與清明自顧雄

豪趣因君江海情歸途望稚子沿月看相迎

越中述懷贈拾殘上人還長沙

流浪已云久東西總類狂會稽雖暫住魏闕那能忘豈
意九州客逢君百鍊剛田衣驚遯跡別酒對愁芳離岸
催舟楫寒暉照野棠飄飄越地遠歷歷楚中行水是洞
庭闊山連巴字長一瓢何寺寄五兩向誰將并竈屈原
宅居人賈誼鄉登樓尙有憶可復下瀟湘

上巳與濟芝禪師登峴山約於秋間入武康風渚

湖共結茅安禪作

同祁大霽後尋山因訊沈萃社陶素耒二子

終日憑芝閣素襟松下披不知荷葉小早被南風吹雨
泛虹橋霽晴飛海月遲看山大禹寺被禊鑑湖湄逸興
陶弘景風流沈亞之問他如載酒須及牡丹時

同客攜酒游封溪因憶朱士稚臥疾

聞道葑溪口羲之蹟可看櫬餘鷺嶺字人至突星灘訪
晉梅仍在啼春鶯欲殘彌天尋竺法解笑有潘安下筍
鱸羹熟嘗新筍味寬片雲從席起遠澗入花寒青嶂游
多遂朱絃和自難因君林表臥流水亦空彈

山陰送李岷源尋天台山水

余亦尋幽客常乘貫月槎未游天竺寺已愛赤城霞送
汝江先涉飛光夕易斜越城花露酒日鑄嶺頭茶祖席
非無意征途莫戀家桃源人可見雙闕路仍賒離岸猿
聲接前山秋色嘉羣仙揮手待碧落駐雲車

雪翁詩集卷十一

五言排律

雪翁詩集卷十二

五言絕句

明慈谿魏 畊白衣撰

天姥吟

我愛稽山好還爲天姥吟
耶溪雙白鷺相送鏡湖深

贈蔣苑

君家住弁山我家住弁山
相見不相送月明自往還

寄吳門陳三島徐晟

月挂郡城樓吳山點點愁
風吹瓊草綠腸斷白蘋洲

金陵城西聞笛

橫笛城西上梅花曲裏多江樓秋月起翻落小黃河

息賢渡

隔浦多茅屋雞鳴度遠村春田各自去桑葉暗柴門

楊柳

枝弱金垂地絲長易拂樓年年灞橋畔供得許多愁

錦石搗流黃

相別流黃機漢使蕭關絕明知人未還猶擣秋闌月

登芙蓉樓

鬱鬱芙蓉樓臨江江上頭鄉愁天際落寒鷺起沙洲

靈隱澗西房

日落樵子靜月出春山明天風吹未了時送澗泉聲

塞上曲

風雪防胡地嫖姚部伍嚴角聲齊上馬夜半搗紅鹽

閨情

十五月團圓明明白玉盤願照漢陽江復照祁連山

太湖聖姑曲

天上三五夜太湖明月滿獨槩過橋頭風吹裙帶緩

獨對吟

霜清鴻雁飛木落湖水闊獨對洞庭山舉觴酌秋月

吳江道中二首

吳江水可愛不減剡溪清惆悵包山月天涯送客明

又

挂席松陵去還尋張翰游白蘋猶可採鱸膾正宜秋

太湖歌八首

三朝上太湖三暮上太湖風帆天際落何日到蒼梧
千里湖波闊青山郡郭遙誰家烏桕樹堪繫木蘭橈
秋來饒白鳥飛雪點青山耐可乘流上芙蓉逐處攀

鷓鴣眠沙暖鴛鴦爭浴喧菰蒲各自戀無復憶飛翻
淥水映芙蓉迴舟向晚風飛來天上月相送意無窮
估客三巴去無人寄素緘慣是湖頭婦朝朝問落帆
日墮蘭陵樹天寒野鴨飛吳娃並著舸齊唱采菱歸
八月鱸魚好三山橘柚紅寄言綺里季我欲挂秋風

與顧有孝

在昔知章少如今有孝稀洞庭春可醉不擬掉舸歸
還息賢堂作

履穿四明雪吟弄太湖月惆悵懷古人臨風復抱膝

答歷陽故人問

尺書遙借問我家
茗雪裏朝見弁山
青暮見弁山紫

答李文達

卻愛稽山李釀熟
肯邀人時時載魏
子蕩漾鑑湖春

錦石搗流黃曲

錦石搗流黃珠簾
拂夜霜不知邊塞
上可自憶衣裳

沈應瑞席上醉後作

莫嘲四明叟醉後
發清狂君看青天
上酒星三五行

洛陽道二首

驅馬洛陽道柳青桃復紅
相逢不相識淚落黃埃中
城門平旦開花落無人掃
車塵萬戶喧知是洛陽道

峴山曲二首

峴山碧湖上風景似襄陽
羅綺迷花月春光總斷腸

又

峴山游冶地歌舞接前溪
花裏迴船好迎人月易低

黃浦亭

昔時黃浦亭鮑昭曾送客
春至柳條青猶餘別離色

晚行碧浪湖

碧湖清且深時見鷗飛處落日澹秋山行歌拂衣去

玉階怨

玉階金殿鎖白日起秋塵含嚔不下淚爲憶翠華春

山行聞琴

幽人懷獨往長嘯碧峰前誰在松篁裏琴彈三峽泉

送友二首

抱琴送友人爲操送遠曲白日下午簾鉤清風動林木
不到菁山久梅花幾度思因君茅屋在我欲過吟詩

寄元庵禪師

遙憶寒山月蒼蒼滿石門東林相別處愁殺夜啼猿

簡贈毛五充舒

山懷桐柏嶺詩愛謝宣城何日攜毛五桃花洞口行

汎西溪曲

見說西溪好芙蓉四面樓曾邀南堰月直上藕花洲

簡留顧樵

茗水似耶水迴船莫憶家女郎多豔采處處映荷花

月湖汎月邀顧樵

月是月湖好無人解醉游須君清興發齊上管絃舟

題鏡湖主人壁

鏡水朝朝對浣紗
顏復紅來時桃李發
去日已秋風
茗谿草堂酬湘湖徐芳聲

四面猿聲嘯懷君
夢裏迴湘湖
尊可采不道未須來

雪翁詩集卷十二
五言絕句

雪翁詩集卷十三

七言絕句

明慈谿魏 畊白衣撰

送劉廷俊

華山西望白雲寒
欲折蓮花頂上看
聞道秋風渡灞水
家家明月搗長安

竹素莊

莫言杜牧碧瀾堂
已似王維輞口莊
送客船迴山月上
檀欒竹下靜聞香

麻溪題王處士壁

麻溪清勝惡溪來風掃楊花觸處開羽客籠鵝愁日暮
不知逸少幾時迴

送劉雲

秋浦東望水葉稀白雲黃鶴故飛飛白雲飛盡鶴飛去
惆悵行人何日歸

折楊柳

江南江北柳花開欲贈行人攀得回無奈花飛輕似霰
何因飛去復飛來

解嘲

滿院荼蘼春色寒
漫嘲白髮興將闌
座中倘出如花女
也解金杯醉眼看

留贈吳六理禎

春日春花爛漫開
題詩聞上越王臺
江東子弟多年少
若個如君小謝才

贈李日焜

年少揮毫不可當
驂騑歸去意飛揚
如余老眼摩娑甚
卻愛風流李十郎

柬內兄凌凱

遙聞初度日南迴滿插榴花綺席開自我天台華頂去
不知誰進紫霞杯

贈何小史

聞道漢時馮子都春風盡日醉當壚嬌顏不惜紅羅裂
得似秦宮花底無

同顧二有孝別祁六班孫

清歌白紵動梁塵腸斷風流賀季真愁殺啼猿與秋月
歸帆偏送五湖人

與朱廿二曉發京口

千峰江上逼人青
兩岸芙蓉照水明
婀娜布帆三十幅
與君談笑抵金陵

陌上美人

無限東山攜妓情
風流那得似卿卿
香車已入桃花去
惱殺青驄驕不行

東閩中林佳璣

黃龍浦上早逢君
處處相隨渡白雲
搖落江花春夢遠
幔亭仙曲幾時聞

四月過喬陽舊業二首

杏葉當門柳乍纖五湖逐客返溪南
東山明月長相待
細寫青蘿百尺潭

粼粼谿水鴨頭青
嫋嫋雲霞好結亭
子晉何須綰嶺去
千年白鶴伴吹笙

晚登天門山望石頭城

孤帆遙指岳陽樓
還到天門頂上頭
遙望金陵秋色裏
橫江日落起沙鷗

賦得白鷺鷥送人

峨嵋一點碧天開
誰上三巴三峽來
白鷺秋飛江漠漠

能令遷客起徘徊

甲午冬客山陰二十餘日不得到雲門醉中呈諸公

魏子山陰雪後游渾如太白醉揚州
嘈然絲管杯中度
不解雲門谿北流

隴西將軍歌

將軍雄銳略如神
丈八蛇矛九尺身
營內時時穿蹋踘
破奴只用五千人

溪汎尋花四絕

浮玉迴船西塞峰
雲霞沒樹野煙濃
爲言谿盡青山接
行到花源春萬重

行歌白谷花深裏
猿嘯清溪花霧寒
疑是漁郎沅水上
非同梅福入吳關

東西天目落花低
流出千溪與萬溪
愁殺昭明讀書處
夜深月白子規啼

遙知錦繡山城近
更惜芳菲隔去津
欲買餘杭無限酒
輕帆游徧五湖春

漫興四首

野老呼兒蕩小舟
許吾喫酒不梳頭
傾銀注玉青楓渚
望月開門白鷺洲

八月水來沙嘴闊
九月水來沙尾圓
太湖漁子且莫喜
三尺黃魚不值錢

江南送客多楊柳
挽斷長條又短條
人世須知有苦別
眼前且莫放香醪

青青楊柳花爭落
撲地攪天真撒鹽
不分長條繫江北
短條又欲繫江南

與沈三寬汎夾山能仁寺

上已同君汎雪西桃花洞壑去還迷
歐餘山水由來異
那用尋源到惡溪

白雀寺觀宋旭畫壁

洞門畫壁看雲煙
宛若騰身跨紫鸞
萬丈峨嵋如可接
倩誰拂石洗青天

漫興一首擬工部

能向花間走一回
朝心暮髮自然開
只消竹葉傾三盞
不用芙蓉飲百杯

漫成一首

渚蒲芽短三春候岸柳絲長雙漿邊金剎珠宮搖綠水
重巒疊幃繞青天

別陳參

壩頭溝水日分流滿眼靡蕪引客愁爭似東西兩天目
青青長對白雲樓

渡曹娥江寄顧有孝朱鶴齡

黃雲漠漠水流澌橫海樓船憶往時聞說英雄還解甲
低頭江上女郎祠

少年行二首

掩映芙蓉拂水清少年得意不知名
春三二月花爭發箇箇鳴鞭出渭城

能騎赭白慣馳風往往雕弧蹈塞東
計斬樓蘭獻紫闕何曾身在羽林中

客中行

我客咸京君客燕客中逢客自相憐
會須日飲蒲桃酒何事低頭逐少年

寄內一首

三月花吹澣墅關秣陵西去有千山
鱸魚味美霜初落

日夜思歸明月灣

出塞行三首

秦中子弟盡臨邊
白草清霜透甲寒
受降城上風吹角
胡馬頻嘶漢月圓

秣馬龍堆出塞城
明妃祠上草青青
當年誰獻和戎策
獨使春閨萬里行

邊將千金黃貉裘
如龍驃騎踏街頭
橫鞭捉打收租吏
奏凱還封小子侯

酬妙喜勤長老

有序

勤與余爲不請友見余陸沈于時鞅掌塵網未暇專
銳祖禪故警句云君從死後歸何處余無以應之乃
效太白答湖州迦葉司馬體酬焉是亦解嘲之意也
巖壑優游天地春有時拂劍入紅塵問余死後歸何處
思益梵天是報身

三月三日夢前身爲劉公幹作

前身知得是劉楨文采風流著玉京爲種菴蘿歸白社
蓮花法藏悟無生

娜兒濛女郎詞二首

雲帆嫋嫋洞庭迴紅碧枝枝桃李開腸斷橋西諸女伴
羅衣障扇踏歌來

蕩舟誤入桃花津十五女郎嬌殺人明月浣紗湖上見
遙知絕勝苧蘿春

浮玉山前歌

玉湖流水碧雲間中有浮玉之仙山裊裊垂楊臨白石
飛花如雪送君還

雪翁詩集卷十三
七言絕句

雪翁詩集卷十四 樂府

明慈谿魏 畊白衣撰

隴西行

曜靈忽已馳不樂何所終
蛺蝶游東園鼓翼自翻風 解一

五經既判散平王周轍東
孔子作春秋嗟麟傷道窮 解二

巨靈擘西華掌跡留洪崖
黃河日夜流漢淪其如何 解三

擣蒲握梟母娛具繁云多
親交殊不來吟嘯倚庭柯 解四

同病而相憐浩歌江上曲
伍員值宰嚭歲晏良淒促 解五

仙道譎不正取訕于聖賢
我欲假良翰上躍滄浪天 解六

升天行扶桑篇

翩翩凌雙鳧俯仰窺八埏浮生竄且羈大小俱不閒貪
財愛惜費辛苦無好顏鬼伯臨路待錄命于泰山上輪
迫風火下輪積薪然陰獸常甘人崩抽肺與肝舍我赤
縣宅永就黃墟間迴觀紫薇墟闔闔玄關辟邪相游
戲靈鳥自飛翽雙闕萬丈內戔戔擁真官顧盼激清嘯
廣樂奏萬端大椿不可匹鏐鏐誠小年塵世旣蜉蝣崑
崙足芝田何不滅彭戶騰躍樊桐巔不見三茅君呼吸
大道全一朝躡虛上兄弟皆神仙

靈芝篇贈牆東翁

靈芝產麟洲朱草被瑤池金玉難並耀光采煥若披古
昔有老萊負釜呼逸妻今有牆東翁偕隱攜綈綦爚爚
閭闔門歸歸姑胥臺積善享壽考承此仁智居皇天錫
福祥眾喜填階墀中堂大置酒羅列紛羽儀盤獻五色
瓜稻進雙穗糜賓客赴若海雷抃讚言辭東廂繁孫子
西壁熾親私各各跽拜起齊聲萬歲期大人憑筵笑慈
母顧而喜此福亦真福塵世安可比歡悰溢四字長詠
南山詩

桂樹篇贈朱雷州

桂樹榮華實植根泰山陽賢哉我朱公在昔理炎方勸
民咸禮讓致民並富昌導彼文身俗洋洋美文章廣海
溢珍寶翠羽及夜光貢獻一無受無忝綰銀黃行政崇
禎世歸老勾踐疆聖廟曆數否帝道毀紐綱臣主有同
運傾覆延禍殃太極定二儀三光昭以明淫暴施凶咎
仁慈降福祥報應迅若響天道終還常安世扶幼主厥
裔頻降康于公恤刑獄後祀姓咸彰公承賢相德庭訓
復垂芳涉冰慄在懷日昃猶不遑是故貽令嗣濟濟皆

賓王會應龍虎嘯功業勒旂常

代武溪深行

爲隴西作也

桓桓駕戈船駐節經五春何爲久勞師太息未改言總
戎有授命安能辭苦辛滔滔踰赤坂火山赫如焚薰體
頭爲痛吹蠱連瘴氛丹蛇與玄蜂十步常螫人周公昔
東征鸛垤尙餘怨矧我自京洛天步多邐迤艱難渡瀘
水日夜與死鄰願秉先登羽歌舞還國門

代關東行

昔我遘厄運流離客關東關東道連縣晝夜鳴北風
行行白登城走馬榆林塞驅驅擣匈奴匈奴陰山外
經昔戰陣處據鞍增我悲烏鳶銜人腸上挂枯桑枝
鳴羣嘯部伍瘡痍十不起椎胸還涕泣涕泣烏能已
仰慙垂白母俯慙子與妻號咷痛入天循環結肝脾
誰言太行險太行平如砥誰言黃河曲黃河直無比
天道詰且屈欲往靡可攀哀哉命矣夫酷烈罹無端
項羽起帳中烏騅不肯行我欲仰天慙南望徒屏營

歷歷白榆行

解一 解二 解三 解四 解五 解六 解七 解八

荏苒滄暑闌曦御忽西徂行游覽天漢歷歷觀白榆奈
何悼良朋音徽頓忽諸孤墳淹江北緣葛成榛墟有
誰臨爾祭繁霜履埏隅在昔孔文舉臨終念構誣亦有
歐陽建邁凶閔潛圖靈運悲衝菌奄昏就黃墟苟能忍
斯痛刀鋸何足虞庸夫謹垂堂啜糜終殄軀安用髮紛
紛徘徊哀雨渠溥露摧芳薜勁飈隕扶蘇顛白不再黑
吾衰苦彫枯解劍空心許撫躬徒自吁洪鈞化彭殤齊
物一虛無天道諒有底禍福胡爲乎吾其豁吾懷高足
步康衢

代朝發廣莫行

慷慨發廣莫據鞍何佻佻充棗無餽糧行行不及餐朝
蹋枳棘墟暮宿霜露間回瞻宛洛都宮闕盡燒燼肝腸
忽抽裂迫促號窮猿摧藏窮林中枯枝不可攀投軀天
北隅曷由騰雙翰昊穹亦以幬黃輿亦以盤恢恢俯仰
大我獨不獲安援琴奏清角撫瑟復調絃人命如夕陽
詎能無所歡爲歡那可度困苦鑠朱顏青青松柏桐瘁
此隆冬寒短轅傾駟荼毒遘險艱雖欲希達生否泰
難齊觀

白楊初生行

蘇秦說秦王十上書不行顏觸見齊宣珪組不肯榮人
生各有志窮達烏足憑古人識朕兆鴻翼待時清矧我
頑鹵姿投足悔吝生末世紛拏駭機何縱橫禍福如
轉炬循環若流星天地雖廣運萬物不獲寧禦寇匿灌
園沮溺依耦耕學圃旣刈蔬稼穡亦云盈願築雲谿館
高蹈謝塵冥天命樂我懷悠悠枌欂情

南山歌一首

南山有畸士頭戴緇撮冠巖居無屋宇灌木上參天被

一統圖千本
褐時負薪謳吟在其間冥冥無塵契安知愚與賢

引聲歌

道何所親親於直方時人闇蔽維曲是將班輸之巧離

朱之明

叶

用厥智力戎興甲兵

叶

外飾仁義內用迴惶

賓禮之會濫及酒漿醉以入房怠戲如攘蛾眉皓齒是
爲毒狼忽焉摧壓範金難長梗枿枿梓笑益於梁吾儀
真人呼吸生光凡有血氣宜警靡嘗

忼慷歌

猛虎不處卑勢勁鷹不立垂枝豪傑徒步言歸恥就鄉

里小兒

放歌行

辟邪雖飢不食狼餘烈士無衣不服牛裾解一暴夫豢養

有志所恥靈龜毀甲終爲禮死解二律律山高洛洛水深

擊我瓦鼓以矢其音解三邪塋敗畚稼穡不收讒口亂政

邦國是憂解四棧棘叢狐蕪城樂鳥皎皎良朋攜手同居

解五日行何健倏焉西隕坐而削船時不可追解六

孤兒行

感里中兒作也

孤兒有父不共餽糜欲薰屋鼠側力後妻

一解孤兒母在

驕稚不斷乳百錢買脆餌五錢買甘李

二解依後母居棄

鬻爲奴

三解

牧豕到鄠杜冬著單布襦野火燒我髮棧棘

攢我軀

四解

叻叻萃鹿麋麋呼麋人生無父母何用乞活

爲

五解

善哉行

福而上同國必昌愚而上同國必亡

一解

文獲呂牙載之

後車紂獲惡來

六直反叶

便營石櫛

二解

大其苑囿高其臺斲

不卹老是以滅灰

三解

得專征伐彤弓旅矢千掩觚蔽𪔐

厥用永年

四解

賢哉成王訪落居憂周公卜洛大朝諸侯

五解

夫差枉辟惡直醜方伍胥不用棄之吳江

六解

麋易

辨胡越見疑陽貨貌同欲殺仲尼

七解

車碎大其輻柱傾

易其樑雖逐逐其猶喪

八解

當來日大難

爲悲甚易爲樂獨難凡我同堂莫不加餐

一解

白日晝翻

霜露夜零愁毒煩苦蜻蛉哀鳴

二解

造茲新聲叩以瓦缶

聊用回腸敢祈稱好

三解

我乘我車子寧無驅我妻我衣

子寧無馳

四解

開門逃死誰者長存敬奉豆觴醉止欣欣

五飛螭媚穴虎悅高岡弦朔有期庶幾徜徉六解

董逃行

我欲上謁王父母各言受命治泰山金銀爲闕一望縹

緲不可牽攀一解王父母將我上天駕辟邪角端自謂高

高無極忽然沈泉口銜芝草使我足蹋腳酸二解碧雞坊

逢協律倡流還教我樂方靴磬祝歌琴中有要道靡曼

迴愁腸三解稽顙射鯉整後廚龍幡婀娜客來遲朱顏微

醅金屈厄齊老壽咸享期頤四解縹醪之酒散千愁七槃

起拂聲咿嚶莫不錯迭觥籌衣裳戍削狐裘明年後歲

長來游

五解

西門行

有人東方來致我蕩子書
蕩子書何言令我生躊躇
初三共下九可用解愁吁

一解

小弟初兩髦今來似墮強小

姑髮覆額今來似我長
小弟娶婦秦羅敷
小姑嫁夫中

山王

二解

園桃何天天無子
筐空提嬌居守獨宿道路那

得知

三解

君馬黃

君馬黃臣馬蒼
君馬駕車臣之良
棄家萬里走疆場
君

馬前臣馬後君馬食粟臣馬豆君馬何肥臣馬瘦君馬
白顛臣馬鐵錢君據轡臣執鞭臣欲爲臣不敢告艱君
但停驂臣有一言

石流

石流磷砢沙微茫的礫江靡蘭草香鵲鵲目奮翼長
縱金鳴鑕白鵲舫橫江不渡風波長薄暮不來空悵悵
何以訾邪南北築室爲我梁

桂之樹行

桂之樹初生乃在樊桐山河水淪淪出其下芝草紛紛

繞其間芝草卻老河水行船我行不逢羨門安得置我
樹桂前喈銅池自生芝角端自入上林苑人生壽命各
在天須臾何必求相緩

歸風操

繁霜慘慘江上楓洪波浩渺洞庭中鷗鷺號渚雁噉噉
忼慨懷人起璇宮仰觀黃姑雲漢蒙河梁咫尺宵靡從
須臾月出入房櫳拭拂綺琴心難通奏曲三闕闕未終
長憂短憂如薄春肝腸摧併老顏容路遠水深津以風
四望躊躇步樓東井長綆促思忡忡寧貯舞衣待春風

白日照見雙飛龍

折楊柳行

白鶴摩蒼天，蹋足沈深淵。須臾戲游遨，自言得神仙。

一解

雌飛欲從雄，繞樹相鳴哀。口欲銜子去，口噤不能開。

二解

驂駕紫雲端，離天三百程。來下不爲遠，歷歷姑胥城。

三解

城中復何見，鶴子翩翩飛不見。白鶴還雙淚，如綆縻。

四解

長歌行

出門逢神仙，乘龍導玉幢。稽首再拜問，延年有何方。不用師真人，西上羽人堂。長跪授要道，補腦藥一箱。真氣

充四體自然壽命長

雪翁詩集卷十四

樂府

雪翁詩集卷十五

五言排律補遺

明慈谿魏

畊白衣撰

簡茅山道士曹珙四十韻

故人遐外隔下走迫風塵多難彫仙骨窮愁鑠性真感
時追昨日凭几憶前春倉卒曾防寇艱難託所親路途
遙在眼烽燧暗生頻仄枕蕪湖晚連檣一柱晨陳平解
刺檣周處不呈身機警渾無敵聰明別有神雄纔兼鎮
惡術豈媿張賓鑒古才宜霸徵今略可倫巨鼇驕跋浪
芳餌早收綸撒手登茅嶺尋師辭海濱

珙上海人淚霄參鸞

驚獻瑞薄麒麟司馬天台並方回南嶽鄰老兄還得道
小弟獨沈淪羈旅爭強健洪鈞順屈伸雲邊空灑淚霞
上遠難陳汨沒淹磨蝎流離類野麋觸奸常折脇失友
屢亡脣狂狷收兒子檻車縛小臣百般遭楚撻萬種極
酸辛納納終安命恢恢幸燭旻朱絲摧自斷貝錦織何
論有醜鴻弛弋徒然龍未馴騫槎誰假借潛徑好逡巡
休說依劉去旋思守阮貧遲迴容貌瘦鹵莽歲華頻
水泯泯潔苔桑處處新陵陽雙漾口長蕩五湖津土剉
懸泥壁山棚挂布紳霜清驅割蜜露冷喚刪筠詎比玄

都宅粗安白髮人
春杭當大藥遣日餐
千椿潦倒非吞炭
伶俜暫避秦臘知
王氏改俗戀漢家
淳二耀如重躍三
垂倘再振魏徵須
仗策黃石會扶輪
共欲誅封豕均看
搏狡獪毋言巖穴
美高臥紫嶙峋

贈朱七毅元二十五韻

亂世輕忠孝誰堪鑄鼎鐘
故人非任俠行徑類朱公
監國紹興際弋陽寶婺東
聲名千里闊斧鉞一朝雄
拜舞藩王殿馳驅老將風
馬騎金匱匠袍奪獸殷紅
滅賊期朝食除殘報上穹
闕牆遭債帥伏莽起清宮
皓骨無歸

地蒼天有棄龍山深逃虎穴背負出樊籠善衛珊瑚玦
全收襁褓功丙侯漢室貴杵臼趙家崇隆準餘生賴高
皇精爽融分明青史客卻喜白頭翁破產多知合粗豪
應許通今年同落魄鎮日對蒙童章句脣乾燥咿唔耳
半聾才高衣食困道屈路途窮原憲憂貧賤伏虔畏老
癯劇談紛感激嗜酒取朦朧索寞五湖側狎狂西塞中
村夫曾不識儒術竟何從上帝眼眞暗長林遯欲終海
門潮送月江岸暮飛鴻攜杖歌憐汝蕭蕭怨落楓

奉賀祁忠敏中丞公商夫人五秩二十韻

嶽降夫人重金泥舊史編扶風書早誦鄒邑禮常先氣

得麟洲迴

夫人家宰商等軒公女也

恩承鸞誥偏潘輿頻送喜祁幕

其推賢節鉞東南相聲名西北連吳人傳鼎鼐越地美

花鈿蛺蝶低翔苑蛟龍欲被煙丹青無藻畫社稷已墟

遷曆數炎劉乾坤大厦顛老臣依日月懷石赴流泉

臥柳園亭在飛鳧沙渚眠陶閨勤剡薦漢臘慎升籙熊

膽謨仍起綵衣舞更妍撒鹽兒擬句

二子理孫班孫擅詩古文詞俱不願

仕指絮女隨肩

二女修媽德荳俱能詩

詞翰堪垂則

夫人自義方有詩集

兼有焉自能開壽域天復致華年桃核何煩借芝房那

用懸休供冬筍異冰獻鯉魚鮮
奕葉延忠孝芬芳勝僊
佺徐看旌表入絳帳必高騫

晨溪月夜

大角搖南極村村離亂邊
微生無所作音做過日只憑顛

瀏眼青陽換驚秋白露泫
淒淒雖咫尺關塞似三千坐
送霞收晚要窺月上弦
客愁照未破何事底能圓
纖悉桂枝動分明玉兔眠
江山風落木烏鵲影迴川
淅淅聞金柝回回憶瀨船
丹心飛漢壘皓首望吳天
見說雲臺築誰傳
曆閣懸燕然真欲勒詞翰
尙如泉

雪翁詩集卷十五

五言排律補遺

雪翁詩集

五言排律補遺

四四明鼓書

四四明鼓書

雪翁詩集卷十六

附錄上

詩評

蔣馭閔云魏子游意篇幅之外洋然自得不以煩簡爲度

朱伯虎云楚白五古初摹漢魏至其得手則在景純游仙支遁讚佛游行晉宋之間若五律純祖少陵離奇天矯難以準繩相格

徐禎起云楚白詩得力於漢魏而沈酣於杜李二家周青士云白衣銳意學杜晚一變而神游於謫仙之門

遂升其堂奧

朱竹垞云白衣僑居吳興別鮮山爲晉沈禎沈聘避地所居有渡曰息賢遂以名其堂其論詩云詩以達情情貴極其所至故樂必盡樂哀必盡哀由唐以前諸家體不必相蒙而其爲至則一也學者各盡其塗徑而入入之愈深見其畛域愈廣恣睢淫佚於其際者久之乃始得其漭漭之樂故涉獵眾家不若專致一家一家之趣旣竭而後馳而去之再適一家其於一家猶是也然後古人之長見而我之長亦見余之於詩初無矜飾務達

其情凡博奕飲酒朋友酬酢以至山川風俗城郭之所
歷覽遺跡之所辨證雜然前陳有觸於懷發之詠歎以
爲合於作者不能自已之旨此則余之所自道已故其
中年專學子美末年專學太白惜乎未見其止也

雪翁詩集卷十六

附錄上

雪翁詩集卷十七

附錄下

文

明處士雪竇先生傳

魏霞

先生初諱時珩又名畊字楚白號雪竇予從兄也生明
萬曆甲寅四月六日父諱忠顯讀書懷古嘗遊學雪川
逍遙山川以歌詠自娛先生初穎異七歲從先君學日
誦數百言覆背如流先君束之嚴母朱孺人謂兒幼乞
少寬之先君曰吾之愛甚於嫂念此兒資性不凡異日
當以文章名世儻學少弛不成大器予之咎也先生謝

曰謹受教越三年而學大進年十四朱孺人卒忠顯公攜先生至霅川課讀弱冠赴童子試歸安縣李公得先生卷歎賞不置會吾慈周公躍雷領癸酉鄉薦爲李公所取士調師至署見先生文拍掌謂李公曰此卷宏深樸茂有古大家風當不徒爲小試冠也揭案列第一歸安儒士競以外籍相阻李公曲全之遂得入歸安庠湖之凌君某義渠先生姪也耳先生名以女妻之己卯督學許公豸歲試冠軍食餽未幾流寇李自成陷京師甲申之變先生懸衣冠於堂上北面稽首曰予雖在草莽

亦君臣也聞錢忠介公移檄會諸鄉老迎監國魯王於
天台遂挾策往從之江寧之敗先生遮道說張忠烈焦
湖入冬水涸不可駐軍英霍山寨畊皆識其蹤請入說
以迎公乃焚舟登陸士卒願從者尙數百人入霍山寨
已受撫不納乃次英山甫渡東溪嶺而追至被獲康熙
元年六月一日殉節於會城官巷口配凌氏聞先生死
流涕曰夫死我不可以獨生遂以髮自經次子高亦自
縊長子喬戍尙陽堡女一適仁和庠生孫某葬先生夫
婦及子於清波門外山麓封土爲牧馬所壤好義者函

骨改葬於靈隱西五寺橋大桐塢碣題曰慈谿魏長白
山人夫婦之墓先生著述甚多有道南集息賢堂初後
集吳越詩選今皆僅有存者

殷軒氏曰先生前明一博士弟子也奮於忠義遂至喪
元不悔余嘗讀竹垞老人所撰貞毅先生墓表其詞隱
涉先生謂死者委之烏鳶狐兔而不可問於呼其亦可
哀也已從弟霞謹撰

雪竇山人墳版文

全祖望

雪竇山人魏畊者原名璧字楚白甲申後改名又別名

甦慈谿人也世胄顧少失業學爲衣工於茗上然能讀書有富家奇其才客之尋以贅壻居焉因成諸生國亡棄去先生所交皆當世賢豪義俠志圖大事與於茗上起兵之役事敗亡命走江湖妻子滿獄弗恤也久之事解乃與歸安錢纘曾居茗谿閉戶爲詩酷嗜李供奉長洲陳三島尤心契之東歸遊會稽有張近道者好黃老管商之術以王霸自命見詩人則唾之曰雕蟲之徒也而其里人朱士稚與先生論詩極傾倒近道見之亦輒罵不置然三人者交相得因此并交纘曾三島稱莫逆

先生又因此與祁忠敏公子理孫班孫兄弟善得盡讀
淡生堂藏書詩日益工然先生於酒色有沈癖一日之
間非酒不甘非妓不飲禮法之士深惡之惟祁氏兄弟
竭力資給之每先生至輒爲置酒呼妓而朱張數子左
右之久之先生又遣死士致書延平謂海道甚易南風
三日可直抵京口己亥延平如其言幾下金陵已而退
軍先生復遮道留張尙書請入焦湖以圖再舉是役也
江南半壁震動旣而聞其謀出於先生於是邏者益急
繼曾以兼金賄吏得稍解癸卯有孔孟文者從延平軍

來有所求於纘曾不饜并怨先生以其蠟書首之先生
方館於邢氏邏者猝至被執至錢唐與纘曾俱不屈以
死妻子盡歿班孫亦以是遭戍初諸子之破產結客也
士稚首以是傾家近道救之得出獄而近道竟以此渡
江遇盜而死己亥之役三島亦以憂憤而死真所謂白
首同歸者矣嗚呼諸子竝負不世之志而遭逢喪亂相
繼以不良死則百六之厄也先生旣死山陰李達楊遷
經營其喪甚力亦以是遭戍而錢唐孫治卒購得先生
骨葬之南屏其後改葬於靈隱石人峰下改題曰長白

山人之墓鄞人墓在湖上者楊職方文琮同以是年死而次年張尙書蒼水亦葬焉時呼曰三忠之墓先生之居於茗上爲晉時二沈高士故山故有息賢堂因名其集曰息賢堂集自言其前身乃劉公幹也粵人屈大均不可一世獨心折先生之詩嘗曰平生梁雪竇是我最知音一自斯人死三年不鼓琴是矣大均蓋嘗再從先生寓鄞其風格頗相近云楊職方之墓在孤山

魏氏譜傳

謙五十九諱時圻字楚白又名耕字野夫號雪竇居士

歸安縣廩生明末起義殉節從祀旌忠祠從弟霞撰有傳全祖望撰有墳版文族孫鳳林撰有贊生明萬曆四十二年甲寅四月初六日卒康熙元年壬寅六月初一日配凌氏貞烈有傳生未詳卒康熙元年壬寅六月初一日合葬西湖靈隱寺五寺橋大桐隲墓前有短碑碑面向裏上書慈谿魏長白山人夫婦之墓生二子喬高

奉萬西郭間魏白衣息賢堂集書 全祖望

聞近得魏白衣息賢堂集不勝狂躍滄桑搶攘文獻凋落至有并姓氏不得傳者何況著述先生惓惓忠孝出

茶鑑藥竈間物親加拂拭裒弘碧血不至盪爲冷風野
馬卽此足扶宇宙一重元氣兼聞白衣有從孫子良能
以表揚先世爲念但以遺事湮沒莫可攷索稱恨是亦
金陀居士流亞塵世中所不多得記前此陶四律天言
渠里中有白衣集卽再拜託以訪購蹉跎許久未得消
息何幸先生已憐我求所下問白衣死事顛末在拙著
滄田錄中原有略節一通但苦不甚詳悉要其大略則
可攷耳按白衣原名璧字曰楚白世籍慈水以贅壻僑
歸安遂充歸安學弟子後改名畊別字白衣又改名甦

稱雪竇山人白衣少負異才性軼蕩傲然自得不就尺
幅山陰祁忠敏公器之爲徧注名諸社中其詩遠摹晉
魏下暨景純游仙支遁讚佛游行晉宋之間近律純祖
杜陵已復改宗太白嘗言詩以達情樂必盡樂哀必盡
哀一切檇蒲六博朋友燕酣城郭之所歷覽金石之所
辨索有觸於懷不期矜飾務達而止此見於竹垞詩話
所述者居吳興別鮮山中爲晉高士沈楨避地所居有
渡曰息賢因以自題其寓旣丁國難麻蹊草屢落魄江
湖徧走諸義旅中當是時江南已隸版圖所有游魂餘

燼出沒山寨海槎之間而白衣爲之聲息復壁飛書空
坑仗策荼毒備至顧白衣氣益厲方張司馬敗北時延
平出海大江路斷司馬躑躅計無所之白衣遮道上書
猶陳金陵形勢請招集散亡入焦湖爲再舉計語在司
馬北征紀略與屈翁山成仁錄司馬旣遁當道頗聞白
衣前策游騎四出刊章名捕白衣亡命潛行望門投至
家大父懷所知詩有廿年熱血埋鴛井萬里桑田寄柳
車之句卽白衣也癸卯以海上降卒至語連白衣白衣
遁至山陰入梅里祁氏園時忠敏子班孫謀募死士爲

衛間道浮海卒爲踪跡所得縛到軍門抗詞不屈死於
會城菜市同時與班孫匿白衣者山陰李達楊遷竝戍
邊外事定山陰張杉葬之西湖白衣之死先張司馬一
年竹垞西河兩集可攷先生以爲甲辰因司馬事同殉
則未盡合其生平詩有前後集僕所見者不過數十首
未知先生所得乃全豹否是時與白衣最善者始寧錢
霍當世所稱魏錢者也其集僕曾見之古詩亦摹太白
顧近體頗不佳爲人風概彷彿白衣其後以事相繼死
前此陶四言其里中本已刊就乃諱其名而以他姓填

之合魏錢爲一集邏舟有過託祭魯公月表特書借名
季漢是亦情理之常不足致怪特是黎邱幻影或遭魚
目之混此則我兩人之所同慮者當俟覓至取先生書
讐對爲一定本以付子良先生其存僕此札以當白衣
小傳也可

息賢堂詩集跋

孫德祖

右魏白衣息賢堂詩集寫本年家子何菁卿孝廉謦祥
購之書肆凡三帙不立卷數署曰魏橋井田丈人著魏
橋者白衣所居集中所云魏家浦故里以存姓也井田

則離其名以爲諱也余與纂慈谿縣志據謝山全氏雪
竇山人墳版文爲魏畊傳蓋原名璧字楚白甲申後改
名畊又曰甦白衣以爲號贅歸安成諸生國亡棄去交
當世豪俠圖大事與於茗上之役兵敗走江湖於吾越
張近道朱士稚太保大學生文懿公孫巡撫忠祁理孫班孫兄弟惠公子
尤善故久於越常主祁氏集中詩多有可考證者其他
所與唱和如長洲陳三島歸安錢繼曾錢唐孫治輩皆
其同志錢卒與偕死孫則購其骨而葬之南屏者也而
西河竹垞秋谷迦陵諸子之流皆有贈答之什白衣在

前朝初不掛仕籍可以死可以無死與諸子同乃身殉
故國巢覆卵破誼無瞻顧良以江上之役浙東忼愷赴
義之士尤夥氣類所感有以成之其視諸子爲昭代詞
臣爲勝朝烈士各行其志不必同歸要於文字之契形
迹無可疑者有若婁東學士異時迫於朝命而出虞山
尙書則終始熱中早更初服白衣何竝有柬寄殆不可
解豈文人結習猶有取於幾復風流未能屏絕邪自敘
息賢作雪巖蓋以音同有合於故鄉雪竇涉筆偶爲異
文又云生平有所撰述悉以命之詩其一也則所謂息

賢堂集者當不止此而全氏稱其爲詩酷嗜李白今觀其古體諸作近供奉者十得五六近體未必一律也以爲西臺慟哭離騷之亞不惟損其藻采稱量分判爾癸未病月從菁卿借讀一過因書菁卿妙齡劬學復有志文獻得此蓋非偶然顧蠹蠹之餘頗有斷蝕故書手不能工亦未免脫譌蓋以研經之眼一一補綴校正之

送魏雪竇序

王猷定

魏子至越閱兩月負笈欲歸客告予曰魏子將行矣嗚呼魏子濟世之器也來越越之人合舍業厚遇之霍月

擊鮮引滿舉白張具日爲酣飲於其行也亦宜出千金
爲囊中裝乃僅與子等落莫者稱相知食糠覈啗蔬菜
伸楮染翰倡和以紆於抑嗚呼魏子濟世之器也而所
遇窮愁如此得無有搖其中而降其志乎予曰魏生以
舟歸乎請以舟喻方其浮大江亂巨區洪濤橫厲上與
天際風雨變怪杳冥不測亦天下之至險矣乃登陽侯
之激湍崇朝百舍無遠不屆者何也惟其舟之足憑也
舟于水則漚也曷足恃也夫材猶吾質也取諸陽木緝
理而堅以其可施剡斲平沈必均也帆猶吾氣也取諸

宏以完以其藉風必強橫畝不墜也檣吾心也取諸正而直正而直雖危懸重繫其何震撼之有柁吾志也取諸匡且廣常操而善運操匡運廣雖滔天巨波其何搖蕩之有至於篙若櫓吾才也取諸剡取諸羸而鍛而舟成矣雖然又貴乎人事之工也夫閉戶而學操舟者自以爲能矣乃出而試諸山溪之濫大者風水奪其技次者灘漩敗其治無他諳練不素而審慎之意少也若人事工矣尤貴天時之順也世固有強濟以要利者弗畏於天日招招於江之濱水解之濱雖有維楫一旦颶風

作水怪興而覆於洪流者尾相啣也故善操舟者舟與水一人與舟一而天不與人一寧舍馳馬逐龍之具於洲渚島嶼之間而不輕進也今以魏子有其具矣又有其技矣而時之不偶故寧與吾輩二三人相與周旋於山榛隱莽而不願入市朝以爭利也而子疑其搖其中而降焉不亦謬乎客作而曰子真知魏子哉敬往告焉以當三爵之餞

詩

梅市逢魏壁

朱彝尊

前年逢君射襄城山樓置酒懽平生淳于一石飲未醉
孟公四坐人皆驚今年逢君梅福市潦倒麤疏已無比
寒暑推移六七年眼前貧賤猶如此悲君失意成老翁
況復奔走隨西東攬鏡不知頭盡白逢人先說耳初聾
山陰祁生賢地主好奇往往相傾許豈無上客朱用與
姜廷梧齊向高堂飯雞黍哀絲急管何其多酒酣坐起舞
婆娑魏生魏生柰爾何百年強半成蹉跎天生汝才豈
牖下何爲抱膝徒悲歌

同魏周二處士集鍾淵映宅遲俞汝言不至

朱彝尊

城隅急雨漲溪沙
酒坐銅盤獨影斜
有約南樓懷謝監
起看江水落江花

懷魏子雪竇

屈大均

平生梁雪竇
是最知音一自斯人歿
三年不鼓琴
文章藏禹穴
涕淚滿山陰
說起今朝事
魂應起壯心

屢得友朋書札感賦

屈大均

慈谿魏子是鍾期
大雅遺音獨爾知
一自彈琴東市後
風流儒雅失吾師

送張南士返越州因感舊遊有作 屈大均

雪竇山人去幾秋彈琴東市亦風流相思最是耶溪月
夜夜清光爲我愁

戲題魏楚白遺集後

全吾騏

越劍天下精越女天下白我嘗讀越絕玄女卽劍客魏
郎兩嗜之而戰竟不克乃知蒼蒼天亦旣厭周德楚白好色

擬筵露詞

全祖望

若邪娃 魏山人挾妓

雪竇山人嗜妓祁公子班孫客之日薦妓焉時

人多薄之不知其成就若此

白衣君遊梅里得妓輒歡喜祁郎君日倒屣徧求若邪
谿娃陪珠履踉蹌復壁登車去越女三千淚如注

同心水登隱山望魏雪竇故居 厲志

登高一悄望遠見海流微張目難久眎北風吹蓬飛回
眄白湖上晶晶漾暖暉鳬鴨慕洲渚參差紛來歸青林
俯暝色蒼澗裊寒霏豈無高隱在紆曲繞幽棲相與動
曠抱悠悠千載思會見魏萬宅山人鸞鶴姿浩歌天地
間雲物爲淒其前哲不可見慷慨徒追維四顧方寂寥

同調將安期

題雪竇山人遺稿

葉二元塔
編次示余

厲志

晶瑩離堅璞哲工受雕鐫任成無窮軌運質見方圓作
爲圭璋具可以薦上天惜哉崑山秀崩鑿付焦原取灰
一持叩其聲猶淵淵造物甘卻棄至美惟自全首陽薇
蕨老萎死霜雪間常人不與食高士來晚年卞生旣徒
荆楚寶亦不傳蠹簡積朽篋光輝暗迴旋千載有其人
明流方涓然蜀魄更何恨青林夜聲喧

雪翁詩集卷十七 附錄下

山人詩五古韻平仄互押如田園之悶信讚佛之化雲
門之蝨寄張近道之震是也又寄張近道之茗湯雜詩
之獨鹿當是屬鏤雖疑有誤未敢擅改餘如送姜侍御之四
南廡懷之拘郵均於義難通四字是否誤寫郵字易四
字於義尙合至寄靈巖繼起禪師之振字的是誤鈔未
敢易以他字讀書詩之嘉韻似應易以嬉字贈錢肅潤
之喜韻若可平仄互押卽喜字亦通癸亥春譚景綸校
畢謹記

余得雪翁詩集於張君冷僧冷僧得之於魏君友枋友枋雪翁之後裔也鈔本自序旣題雪翁而息賢堂均作雪巖堂與相傳作息賢堂者異然詩集中詠息賢草堂者亦屢見今仍其名曰雪翁詩集惟息賢作雪巖者爲之更正取伏跗室鈔本更參以甬上續耆舊詩校補之而忻君紹如復得謝山選耆舊詩採錄之原本五言古一卷互相斟酌益臻精審紹如復告余曰謝山撰萬編修經神道碑有云雪竇山人之集爲人所得冒以爲先人之作公購而正之并訪其南屏埋骨之所見鮎埼亭

集然則是集之存固由魏氏後裔珍藏弗失而九沙當日鄭重鄉邦文獻收拾先烈著述與遺骨並重其功亦不可沒矣因表之附錄一卷馮君孟顓輯也憶自癸亥余在杭州既得斯鈔卽囑陸君鼎元謄寫副本復倩譚君景綸細校藏庋幾十年矣始得刻竣而譚君已作古人譚君字味農湖南人能詩文今存其校語以誌感焉

民國二十一年六月張壽鏞跋